

Olimpiades 2026

Manifestazion dl'identité ladina

L'UGLD-Union Generela di Ladins dla Dolomites invieia i organisadours y i raprezentanc dles Provinzies con popolazion ladina de adoré ence l lingaz ladin y mostré la cultura ladina. N apel fej ence la Union Ladis de Anpezo de taché fora la bandiera ladina sun les ciases

L'UGLD sciche organisazion souraregionala di Ladins dles Dolomites i ouj n apel ai responsabili dl'organisazion di Juesc Olimpics 2026 y ai raprezentanc dles Provinzies de Bulsan, Trent y dla Region Venet de tò en considerazion adeguatamenter l lingaz ladin, la cultura ladina y l grup etnich ladin en gaujon dl desframent dles competizions agonistiches y dla comunicazion coliedes a chestes.

Da sia pert à l'UGLD programé ativités desferentes per chest gran event internazional. Al é vegnù realisé mini-dizionars aposta de terminologia sportiva per ladin con traduzion tl todesch, talian, ingleis, franzeis y spagnol, che vegnirà partis fora jornalisc interessés, acompagnadours sportifs y atlec.

Tres informazions miredes, tla forma de placac y videos, vuélen tré l'atenzion dl publich sun la realté ladina.

A Cortina d'Anpezo invieia la seziun locala dla Union di Ladins la jent de abelì l paisc con i colours dla bandiera ladina. Laprò informaràla diretamenter l publich internazional sun i temesc ladins.

Che l lingaz ladin y la cultura ladina vegne raprezentades adeguatamenter ence tles zerimonies ofiziales di Juesc Olimpics é de importanza fundamentala. Les competizions de Antholz y Pardac se desfireia defat sun porta de ciasa dl teritore linguistich ladin, tratant che cheles de Cortina d'Anpezo é tl cuer dla Ladinia.

Per l'UGLD

L President

Roland Verra